

Minister Dr. Alex Schwengle:

Boy Escalona ta e motor pa yuda pashentnan di Alzheimer

ORANJESTAD (AAN): Na Cas Marie, cual ta un cas special pa esunnan cu ta sufrí e enfermedad di Alzheimer tabatin un ceremonia special unda a lansa e buki "Mi bida mi fe" skirbi pa Boy Escalona. E buki aki ta uno special skirbi specialmente pa recauda fondonan pa Cas Marie. Ta e historia di bida di Boy Escalona desde cu el a nace te cu e decision cu a pon'e pa bay mas pega cu Dios y pa zorg completamente pa su señora cu a haya Alzheimer.


Durante di e añanan aki el a bay diferente convencion y seminario tocante Alzheimer. Asina el a envolbe su mes. Awor cu e buki aki e kier conscientisa comunidad riba con por yuda e institutonan y djis bisa cu gobierno tin cu paga o haci. "Ban mira kico nos mes por haci", Escalona a expresa.

Un di e personanan cu ta hopi consciente riba e importancia di conscientisa nos comunidad ta Minister di Salud, Deporte y Cuido di Nos Grandinan, Dr. Alex Schwengle. Den su number pa ricibi e buki tabata presente na e ceremonia aki Minister Presidente mr. Mike Eman y Minister di Infraestructura Benny Sevinger. E ultimo aki a manifesta cu Cas Marie ta haciendo un tremendo trabao pa duna e persona y e famia un mihó calidad di bida.

"Di parti di Gobierno di Aruba y mi colega Minister Dr. Alex Schwengle cu ta riba un bishita di trabao y actualmente ta permanece den exterior... mi ta yama Boy pabien cu e buki. Mi ta sigur cu e produccion aki lo por contribui den forma positivo na bienestar di e clientenan di Cas Marie y Aruba en general", Minister Sevinger a bisa.

Banda di esaki Minister Schwengle a laga un mensahe atras y ta expresa: "Boy, masha pabien cu e logro aki nos ta spera cu bo por sigui ta e motor tras di e bon causa aki y cu bo por brinda bo conocimiento, experiencia y energia positivo na cliente y famianan di esunnan cu ta biba cu demencia y Alzheimer".

Mientras cu remedinan a faya constantemente pa preveni Demencia y e enfermedad Alzheimer of pa reduci su desarojo den aparece, sentido co-



mun y actividadnan di salud por haci un gran impacto y diferencia esaki segun investigacionnan recien, e minister a agrega.

Demencia ta horta bida, e mama trahado cu a cuida su yiunan y su famia pa hopi aña, e tata fuerte cu a disciplina y stima su yiunan, e wela, welo ruman tanta, omo, primo amiga cu semper a yuda, a contribui y cu tabata semper dispuesto pa coopera cu cualkier situacion familiar.

E persona ey ta yega un momento cu e no ta reconoce niun di su sernan kerí mas. E ta casi inimaginabel con nos por observa nan amor y dedicacion slip bay laga nos mientras cu físicamente nan ta sinta of para nos dilanti. Y cada dia un cantidad di e situacionnan aki ta manera pelicularnan cu ta hunga patras di porta.

Ta parece cu nos ta biba den un negacion colectivo lubidando un cantidad di nos hendenan na hospital, casnan di anciano of banda di nos na cas mes cu ta biba cu demencia. Nos tur sa cu den e próximo 10 aña nos comunidad lo biba mas largo nos no ta para keto pa pensa cu e cantidad di hende cu lo keda diagnostica cu Alzheimer tambe lo crece den forma significante, Minister Schwengle a agrega den su discurso.

"Nos tin cu bringa contra di stigmatizacion di nos grandinan, apoya nan pa keda miembronan activo den nos comunidad pa nos purba preveni desaroyo rapido di demencia y Alzheimer den nos comunidad", tabata e palabranan emotivo cu Minister Schwengle a laga resona durante e momento special aki.

